

CATAS DE GALICIA 2017

XVI CATA DOS MELES



Organizada pola Consellería do Medio Rural, coa colaboración do consello regulador da indicación xeográfica protexida Mel de Galicia, terá lugar a XVI Cata dos Meles de Galicia 2017, que consistirá nunha precata ou cata de selección e nunha cata final.

BASES DA CATA

1. Participantes.

Nesta cata poderán participar os meles envasados polas industrias inscritas no rexistro da indicación xeográfica protexida Mel de Galicia.

O mel debe pertencer á colleita do ano 2017 e deberá estar previamente cualificado polo consello regulador.

As industrias interesadas deberán enviar o boletín de inscrición anexo, debidamente cumprimentado, ao seu consello regulador, antes das 14 horas do día 31 de outubro de 2017.

2. Categorías.

Establécense dúas categorías:

- Categoría A: Meles monoflorais

Esta categoría inclúe calquera dos meles monoflorais (eucalipto, castiñeiro, silveira e breixo) incluídos no regulamento da indicación xeográfica protexida Mel de Galicia que cumpra as características propias destes meles.

- Categoría B: Meles multiflorais

Inclúense nesta categoría os meles non considerados na categoría A, por non reunir os requisitos da mesma.

As industrias envasadoras de mel que desexen participar nesta cata só poderán presentar unha mostra por categoría.

3. Non será admitida ningunha industria envasadora que nos dous anos anteriores á presente cata, fose sancionada por infracción moi grave á lexislación agroalimentaria mediante resolución firme da Consellería do Medio Rural.



4. Recollida de mostras.

A identificación e recollida das mostras participantes, será realizada pola organización coa colaboración do consello regulador, de acordo co programa que previamente se estableza. Levantarase unha acta de recollida, que asinará un representante da industria e un representante da comisión de recollida.

O representante da industria deberá sinalar, na mencionada acta, en que categoría desexa participar. No caso da categoría A, deberá concretar o tipo de mel monofloral (eucalipto, castiñeiro, silveira ou breixo).

A mostra constará de 4 envases de mel de 500 g, de idénticas características, elixidos ao chou de entre o lote que se presente á cata. Un dos envases quedará na industria e os restantes empregaranse na realización da cata-concurso.

Para asegurar o anonimato da marca participante na cata, e dada a gran diversidade dos envases empregados na expedición comercial dos meles, as mostras recolleranse en envases de cristal transparente sen marcas, debuxos nin calquera outro elemento que puidera levar á súa identificación.

Os envases serán etiquetados e numerados cun díxito que substituirá a etiqueta identificativa habitual do produto, e quedará rexistrado xunto coa marca comercial, categoría e o número de lote na acta de recollida correspondente. As etiquetas de cada envase serán asinadas por un representante da industria e por un representante da comisión de recollida.

As mostras recollidas serán transportadas ata o lugar de celebración da cata, onde se depositarán nun almacén precintado ata o momento do inicio desta.

5. Xurado de cata.

Para a supervisión da cata nomearase un xurado que levantará acta de todas as incidencias na cata. Actuará como presidenta a directora xeral de Gandaría, Agricultura e Industrias Agroalimentarias e como secretario un funcionario da Subdirección Xeral de Industrias e Calidade Agroalimentaria. No xurado estará representado o consello regulador.

O secretario do xurado comprobará as actas de recollida, o número e o selo das mostras dos meles recollidos e procederá a numeralas de novo de forma correlativa. As mostras serán novamente depositadas, permanecendo debidamente pechadas e precintadas ata o momento de iniciarse a cata de selección.

Se neste acto de numeración dos meles aparece algunha marca ou sinal que poidera permitir o seu recoñecemento, a mostra será anulada.

6. Panel de cata.

Para a cualificación dos meles contarase con sete expertos en análise sensorial, que poderán proceder de centros tecnolóxicos e científicos agroalimentarios, consellos reguladores, restauración, distribución especializada e medios de comunicación especializados.

Os catadores empregarán un tipo de ficha de cata aprobada pola organización.

Para a puntuación de cada mostra de mel obterase a media das puntuacións individuais dadas polos catadores que compoñen o panel de cata, eliminando previamente as puntuacións extremas. En caso de empate, calcularase a mediana.



7. Procedemento da cata.

Os meles cataranse por series, realizándose os descansos precisos ata a conclusión da análise sensorial das mostras. O número máximo de meles seleccionados que pasarán á cata final será de seis por categoría.

As mostras de mel seleccionadas para a cata final serán renumeradas correlativamente polo secretario do xurado e permanecerán depositadas e debidamente custodiadas ata o momento da súa celebración.

A cata final realizarase seguindo as normas establecidas para a precata.

Finalizada a cata-concurso, o secretario do xurado procederá a identificar os meles premiados, e introducirá os datos das marcas e industrias premiadas en sobre pechado.

Este sobre abrirase no momento da entrega de premios, permanecendo entre tanto en poder do secretario do xurado.

O xurado desta cata-concurso coidará especialmente que se conserve o anonimato das mostras en todo momento. O seu ditame nos premios será inapelable.

8. Distincións.

Establécense para esta cata-concurso, os seguintes premios:

- Categoría A: Distinción de Ouro.
Distinción de Prata.
Distinción de Bronce.
- Categoría B: Distinción de Ouro.
Distinción de Prata.
Distinción de Bronce.

Ás industrias envasadoras premiadas en cada categoría entregaráselle un trofeo que identifique o posto acadado (1º, 2º ou 3º). A entrega dos premios realizarase nun acto convocado e organizado para tal fin ao que se dotará da difusión, transcendencia e solemnidade axeitada.

9. Todos os participantes nesta XVI Cata dos Meles de Galicia comprométense a acatar as presentes bases.

10. A Directora Xeral de Gandarías, Agricultura e Industrias Agroalimentarias, ditará cantas disposicións sexan necesarias de cara ao correcto desenvolvemento desta XVI Cata dos Meles de Galicia.